

辨

證

錄

辨證錄卷之十二

山陰陳士鏗敬之甫號遠公又號朱華子著述

會稽陶式玉尚白甫號存齋又號 叅訂

安胎門

婦人小腹作痛胎動不安如下墜之狀人以爲帶脉之無力也誰知脾腎兩虧乎夫胞胎雖係於帶脉而帶脉實關於脾腎二經虧損則帶脉力微胞胎何能勝任乎然人致脾腎之虧者非因於飲食之過多卽由於色慾之太甚不補脾補腎而帶脉迫急胞胎所以下墜也第胞

胎通於心腎不通於脾補腎可也何必補脾不知脾胃  
爲後天腎爲先天脾非先天之氣不能化腎非後天之  
氣不能生補腎不補脾則腎之精正不能遽生也補後  
天之脾正所以補先天之腎補先後天之脾腎正所以  
固胞胎之氣蓋胞胎原備先後天之氣安可不兼補先  
後天脾腎哉方用安奠二天湯人參一兩白朮一兩熟  
地一兩山茱萸五錢山藥五錢炙甘草一錢杜仲三錢  
枸杞子二錢扁豆二錢水煎服一劑痛定二劑胎安不  
必二劑夫胎動乃脾腎雙虧之症必須大用參朮熟地

補陰補陽之味始能挽回於頃刻世人往往畏用參朮或少用以冀建功反致寡效此方正妙在多用也

用疑親湯

亦效

熟地一兩白朮一兩甘草一錢人參  
五錢杜仲五錢山藥五錢水煎服

婦人懷妊至三四月自覺口乾舌燥咽喉微痛無津以潤以致胎動不安甚則血流如經水人以爲火動之故也誰知水虛之故乎夫胎非男精不結亦非女精不成逐月養胎古人每分經絡其實不能離腎水以養之也故腎水足而胎安腎水缺而胎動又必腎火動而胎始不

寧蓋火之有餘仍是水之不足火旺動胎補腎水則足以安之矣惟是腎水不能遽生必須上補肺金則金能生水而水有化源無根之火何難制乎方中少加清熱之品則胎氣易安方用潤燥安胎湯熟地一兩山茱萸五錢益母草二錢黃芩一錢麥冬五錢生地三錢阿膠二錢五味子二分水煎服二劑燥減又二劑胎安連服十劑胎不再動矣此方專添腎中之精雖兼於治肺然補肺無非補腎故腎經不燥火不燥胎安得而不寧靜乎

用過炎散

亦效

熟地一兩玄參地骨皮麥冬各五錢北五味子甘草各一錢貝母五分炒棗仁五錢水煎服

婦人有上吐下瀉以致胎動下墜疼痛難忍急不可緩人  
以爲脾胃之寒極也誰知脾胃之虛極乎夫脾胃氣虛  
則胞胎無力必有崩墜之虞况加上吐下瀉則脾胃  
愈虛欲胞胎無恙得乎然而胞胎雖疼痛而猶不下者  
蓋脾胃雖損而腎氣尙固也胞胎系於腎而連於心腎  
未損則腎氣交於心心氣通於胞胎所以未至於胎墜  
也且腎氣能固則腎之氣必來生脾心氣能通則心之

氣必來援胃脾胃雖虛而未絕則胞胎雖動而未落耳  
治法可不急救其脾胃乎然而脾胃將絕止救脾胃而  
土氣難生更補助其心腎之火則火能生土尤易接續  
也方用援土固胎湯人參一兩白朮二兩肉桂二錢山  
藥一兩附子五分炙甘草一錢杜仲三錢續斷三錢枸  
杞子三錢山茱萸一兩兔絲子三錢砂仁三粒水煎服  
一劑瀉止二劑吐止腹中疼痛急迫無不盡止也此方  
救脾胃之土十之八救心腎之火十之二救火輕於救  
土者豈土欲絕而火未絕乎不知土崩非重劑不能援

火息雖小劑亦可助熱藥多用必有太燥之虞不比溫補之品可以多用況懷妊胎動原係土衰非係火衰也何必用大熱之劑過於助土以傷胎氣哉

用脾胃兩安

湯亦效

白朮五錢白茯苓人參各三錢陳皮五分  
砂仁一粒山藥一兩薏仁五錢水煎服

婦人有懷抱憂鬱以致胎動不安兩脅悶痛如子上懸人  
以爲子懸之病誰知是肝氣之不通乎夫養胎半係腎  
水然非肝血相助則腎水亦必有獨力難支之勢使肝  
經不鬱則肝氣不閉而肝血亦舒自然灌注於胞胎以



助腎水之不足今肝因憂鬱則肝且閉塞不通子無血  
蔭安得不上升以覓食乎此子懸之所必至乃氣使之  
升非子之欲自懸也治法不必治子懸以瀉子但開肝  
氣之鬱結補肝血之燥乾則子懸自定方用解懸湯白  
芍一兩當歸一兩炒梔子三錢枳殼五分砂仁三粒白  
朮五錢人參一錢茯苓三錢薄荷二錢水煎服一劑悶  
痛除二劑子懸定三劑全安去梔子多服數劑尤妙此  
方乃平肝解鬱之聖藥鬱開而肝不去尅土肝平而木  
不去生火况方中又有健脾生胃之藥自然水穀生精

四布各藏肝腎有潤澤之機則胞胎自無乾澁之患何至嬰兒之上懸哉

用通肝散

亦佳

白芍一兩歸身川芎茯苓各三錢鬱金薄荷各一錢  
香附神曲各二錢陳皮三分蘇葉五分白朮五錢水  
煎服

婦人有跌閃失足以致傷損胎元因而疼痛人以為外傷之故也誰知仍是內傷之故乎凡人跌撲閃挫亦能動胎若作跌閃外治未能奏功且有因治反墮者必須大補氣血少加行動之味則瘀血自散胎又得安然補血

宜多補氣宜少方用救損湯治之歸身五錢白芍三錢  
白朮五錢人參一錢生地一兩甘草一錢蘇木三錢乳  
香末一錢沒藥末一錢水酒煎服一劑疼痛止二劑胎  
不墮矣不必三劑此方既能去瘀又不傷胎蓋補血補  
氣復無停滯之憂更少通滑之害治無胎之跌閃可建  
奇功治有胎之跌閃尤有殊績者也

亦可用救傷

散治之

歸身熟地各二兩白朮白芍生地杜仲  
各五錢甘草一錢丹皮二錢水煎服

婦人有胎雖不動腹亦不疼然時常有血流出人以爲血

虛胎漏也誰知氣虛不能攝血乎夫血能蔭胎胎中之血必藉氣以包之氣虛下陷血乃隨氣亦陷矣夫氣虛則血必旺血旺則血必熱血寒則靜血熱則動動則必有躍躍欲出之兆况加氣虛安得不漏泄乎猶幸其氣之虛也倘氣旺血熱則血必大崩不止些些之漏出矣治法補氣之不足瀉火之有餘則血不必止而自止方用助氣補漏湯人參一兩甘草一錢白芍五錢黃芩三錢生地三錢益母草二錢續斷二錢水煎服一劑血止再劑不再漏也此方用人參以補陽氣用黃芩以漏陰

火火瀉則血不熱無欲動之機氣補則血能包無可漏之竅自然氣攝血而血歸經寧有漏洩之患哉

用攝血丹

亦效

黃芪白朮各五錢人參二錢甘草荊芥破故紙各一錢續斷二錢肉果一枚水煎服

婦人有懷妊至七八月忽然兒啼腹中腹亦隱隱作痛人以爲胎熱之故也誰知氣虛之故乎夫兒在胎中母呼亦呼母吸亦吸未嘗有一刻之間斷也然嬰兒至七八月母之氣必虛兒不能隨母之氣以呼吸則子失母氣而作啼矣腹中聲啼似乎可異其實不必異也治法大

補其氣使母之氣能哺於子則子之氣既安而子之啼亦息方用止啼湯人參一兩黃芪一兩當歸五錢麥冬一兩橘紅五分甘草一錢天花粉一錢水煎服一服卽止啼二服斷不再啼也此方用參芪歸冬以補肺氣以肺主氣也肺氣旺而胞胎之氣不弱胞中之子自安矣所以一二劑而奏功耳

用接氣飲

亦效

人參白朮黃芪麥冬各五錢茯苓三錢當歸三錢貝母神曲各一錢炮薑五分水煎服一劑卽止啼四劑不發

婦人有口渴出汗大飲凉水煩燥發狂腹痛腰疼以致胎動欲墮此乃胃火熾炎熬乾胞胎之水故耳夫胃爲水穀之海多氣多血以養各藏府者也萬物皆生於土土氣厚而物生因土中有火也然則火在胃中宜乎生土何以火盛反致太乾以害土乎不知無火難以生土而多火又能燍水也土中有火則土不死土中無水則爲焦土使胃火過旺必致先燍腎水而土中燥裂何以分潤於胞胎哉土燍之極火勢炎蒸犯心而神越以致嬰兒逼迫安得不下墮乎治法必須急瀉其火濟之以水

水旺而火自衰火衰而胎自定也方用止焚定胎飲玄  
參二兩甘菊三錢青蒿五錢茯苓三錢生地一兩知母  
二錢白朮五錢人參三錢天花粉二錢水煎服一劑狂  
少平二劑狂大定三劑火盡解胎亦安也不必四劑此  
方藥料頗大恐有不勝之憂第懷妊而火盛若此非用  
大劑之藥火不肯息狂不肯止而胎不肯寧也然而藥  
料雖多均是補水之味亦正有益無損不必顧忌耳

用滋胎飲

亦效

麥冬二兩黃芩三錢生地歸身各一兩天花  
粉二錢甘草一錢水煎服二劑狂大定四劑愈



婦人懷子在身痰多吐涎偶遇鬼祟忽然腹痛胎向上頂  
人以爲子懸之病也誰知亦有中惡而胎不寧乎凡不  
正之氣最能傷胎蓋陰邪陽祟多在神宇潛踪幽陰岩  
洞實其往來之所觸之最易相犯故孕婦不可不戒也  
治法似宜治痰爲主然而治痰必至耗氣之虛則痰雖  
消化胎必動搖必須補氣以生血補血以活痰少加消  
痰之味則氣血不虧痰又易化方用消惡安胎湯白朮  
五錢甘草一錢白芍一兩陳皮五分蘇葉一錢沈香末  
一錢乳香末一錢天花粉三錢當歸一兩人參三錢茯

苓五錢水煎調服一劑腹痛定鬼神亦遠矣此方大補氣血惟圖顧本正足而邪自消痰清而胎自定也

用散惡護胎

丹亦效

人參三錢茯苓五錢白朮五錢半夏一錢貝母一錢甘草一錢白微一錢管仲三錢水煎服一服胎安

婦人懷妊之後未至成形或已成形其胎必墮而性又甚急時多怒氣人以爲氣血之衰不能固胎誰知肝火之盛常動而不靜乎蓋木中實有相火也相火宜靜不宜動靜則安動則熾然而木中之火又最易動而難靜况加大怒則火更動而不可止遏火勢飛揚不能生氣化

胎反致食氣傷精自然難蔭而易墮治法必須平其肝中之火大利其腰臍之氣使氣生血而血清其火也方用利氣瀉火湯白朮一兩當歸三錢甘草一錢黃芩二錢人參三錢白芍五錢熟地五錢芡實三錢水煎服服二月胎不墮矣此方名爲利氣其實乃補氣也補氣而不加之瀉火之藥則氣旺而火不能平轉害夫氣矣加黃芩於補氣之中益以熟地歸芍之滋肝則血不燥而氣益和氣血旣和不必利氣而無不利矣况白朮最利胃臍者哉

用息怒養姪

湯亦佳

白芍二兩茯苓五錢人參三錢陳皮五分甘草一錢  
熟地一兩生地五錢白朮五錢神麴一錢水煎服



## 小產門

婦人因行房顛狂遂至小產血崩不止人以爲火動之極也誰知是氣脫之故乎凡懷孕婦人惟藉腎水蔭胎水原不足水不足而火易沸加之久戰不已則火必大動若至顛狂則精必大泄腎水益乾腎火愈熾水火兩病胎何能固胎墮而火猶未息故血隨火崩有不可止之勢治法自當以止血爲主然而火動由於水虧血崩本於氣脫不急固其氣則氣散不能速回血將何生不大補其精則精涸不能遽長火且益熾方用固氣填精湯

治之人參一兩熟地一兩白朮五錢當歸五錢黃芪一兩炒黑荆芥二錢三七根末三錢水煎調服一劑血止再劑身安四劑全愈此方全不清火惟補氣補精救其匱乏奏功獨神者以諸藥甘溫能除大熱也蓋此熱乃虛熱非實熱耳實熱可以寒折虛熱必須溫補故補氣自能攝血補精自能止血也

用固氣止脫

湯亦效

人參熟地山茱萸各一兩白朮麥冬各五錢甘草一錢丹皮三錢木煎服

婦人因跌撲閃損遂至小產血流紫塊昏暈欲絕人以爲

瘀血之作祟也誰知是血室傷損乎夫婦人血室與胞胎相連胞胎損而血室亦損然傷胞胎而流血者其傷淺傷血室而流血者其傷深矣傷淺者漏在腹傷深者暈在心同一跌閃之傷也未小產與已小產治各不同未小產而胎不安者宜顧其胎不可輕去其血已小產而血大崩者宜散其血不可重傷其氣蓋胎已墮矣血既盡脫則血室空虛惟氣存耳倘又傷其氣保無氣脫之憂乎故必須補氣以生血新血生而瘀血可止也方用理氣止瘀湯人參一兩黃芪一兩當歸五錢紅花一



錢丹皮三錢炒黑乾姜五分茯苓三錢水煎服一劑瘀  
血止二劑昏暈除三劑全安此方用人參黃芪以補氣  
氣旺而血可攝也用當歸丹皮以補血血生而瘀難留  
也用紅花黑姜以活血血活而暈可除也用茯苓以利  
水水流而血易歸經也

用加味補血

湯亦神

黃芪二兩當歸人參各一兩丹皮三  
錢荆芥三錢益母草三錢水煎服

婦人懷娠口渴煩躁舌上生瘡兩脣腫裂大便乾結至數  
日不通以致腹痛小產人以爲大腸之火也誰知是血

熱爍胎乎夫血所以養胎者也然血溫則胎受其利血  
熱則胎受其損兒在胞中不啻如探湯之苦如何存活  
自然外越下奔以避炎氛之逼耳夫血乃陰水所化血  
日蔭胎則取給甚急陰水不能速生以變血則陰虛火  
動陰中無非火氣則血中亦無非火氣矣兩火相合焚  
逼兒胎此胎之所以下墮也治法清胞中之火補腎中  
之精始可矣蓋胎中純是火氣此火乃虛火非實火也  
實火可瀉虛火宜於補中清之倘一味用寒涼之藥以  
降其火全不顧胎之虛實勢必寒氣逼人胃中生氣蕭

索何以化精微以生陰水乎不變爲癆瘵者幾希矣方  
用四物湯加減治之熟地五錢白芍三錢川芎一錢當  
歸一兩山茱萸二錢山藥三錢梔子一錢丹皮二錢水  
煎服連服四劑餘血淨而腹痛全消

用生地飲

亦神

生地二兩於未小產前救之若已小產  
此方亦可用或減半用之尤爲萬安也

娠婦有畏寒腹痛因而落胎者人以爲下部太寒也誰知  
氣虛而又加寒犯遂至不能攝胎而下墮乎夫人生於  
火亦養於火然火非氣不充氣旺而後火旺氣衰則火

不能旺矣人之坐胎者受父母先天之火也先天之火  
卽先天之氣成之故胎成於氣亦攝於氣氣旺則胎牢  
氣衰則胎弱胎日加長氣日加衰安得不墮哉况遇寒  
氣之外侵則內之火氣更微當其腹痛時卽用人參乾  
姜之藥則痛止胎安無如人之不敢用也因致墮胎僅  
存幾微之氣不急救其氣用何法以救之乎方用黃芪  
補血湯黃芪二兩當歸一兩肉桂五分水煎服一劑而  
血止三劑而氣旺庶不致有垂絕之憂也倘認定是寒  
大用辛熱之品全不補其氣血則過於燥熱必至亡陽

又爲可危耳

用加味參朮

湯亦效

人參一兩白朮五錢甘草一錢  
肉桂一錢白蘆豆三錢水煎服

妊婦有大怒之後忽然腹痛因而墮胎及胎墮之後仍然  
腹痛者人以爲肝經之餘火未退也誰知血不歸經而  
痛乎夫肝藏血大怒則血不能藏宜失血而不宜墮胎  
胡爲血失而胎亦墮乎不知肝性最急血門不閉其血  
直搖於胞胎而胞胎之系通於心腎之間肝血來衝心  
腎路斷而胎氣一時遂絕此胎之所以墮也胎既墮

血猶未盡故餘痛無已也治法引其肝血仍入於肝中而腹痛自止然而徒引肝血不平其肝木之氣則氣逆不易轉卽血逆不易歸也方用引氣歸血湯白芍五錢當歸五錢炒黑荆芥三錢白朮三錢丹皮三錢炒黑乾姜五分香附五分鬱金一錢甘草一錢麥冬三錢水煎服此方名爲引氣其實仍皆引血也氣血兩歸腹猶作痛余不信也

用歸經佛手

散亦神

當歸一兩川芎白朮各五錢荆芥三錢炒黑乾姜一錢甘草一錢人參三錢熟地一兩水煎服

[illegible]

## 鬼胎門

婦人有懷妊終年不產面色黃瘦腹如斗大肌膚消削常至二三年未生者此鬼胎也或入神廟山林起交感之念皆能召祟成胎幸其人不至淫蕩見祟驚惶遇合愧慙則鬼祟不能久戀一交構而去然而淫氣妖氛已結於腹遂成鬼胎其先人尙未覺迨後漸漸腹大蓋人身之氣血不行內外相包一如懷胎之兆有似血臑之形其實非胎非臑也治法必用逐穢之藥爲主但人至懷胎數年卽非鬼胎其氣血必衰况非真妊則邪氣甚旺



正不敵邪虛弱可知烏可以迅利之藥竟用祛蕩乎自  
必從補中逐之爲得方用蕩鬼湯雷丸三錢大黃一兩  
紅花三錢枳壳一錢厚朴一錢桃仁二十粒當歸一兩  
人參一兩牛膝三錢丹皮三錢水煎服一劑腹必大鳴  
瀉出惡物半桶再服二煎又瀉惡物而愈斷不可用三  
劑也此方用雷丸以祛穢又得大黃之埽除佐之紅花  
厚朴等藥皆善行善攻之品亦何邪能留於腹中自然  
盡情逐下然用參歸以補氣血則邪去而正又不傷否  
則單用雷丸大黃以迅下之必有血崩氣脫之害矣倘

或自知鬼胎如室女寡婦之人一旦成形雖邪氣甚盛而真氣未濟可用岐天師新傳紅黃霹靂散紅花半斤大黃五錢雷丸三錢水煎服亦能下胎然未免過傷血氣不若蕩鬼湯有益無損之更佳也亦在人斟酌而善用之耳

用追崇丹

亦神效

大黃五錢枳實三錢丹皮一兩紅花半斤附子二錢當歸尾一兩人參五錢牛膝五錢麝香一錢鱉甲一兩半夏三錢南星三錢桃仁十四粒水煎服一劑而胎破矣不須二劑瀉出惡物之後單用當歸三兩紅花一兩水煎服自然敗血淨而新血生也連用四劑自慶安然

[illegible]

## 難產門

婦人腹痛數日不能生產人以爲氣虛力弱不能送子出產門也誰知血虛膠滯胎中無血兒不易轉身乎夫胎之成由於腎之精而胎之養半資於五臟六腑之血故血旺者子易生血衰者子難產所以臨產之前必須補血雖血難驟生補氣正所以生血也然徒補其氣不兼補其血則陽過於旺而陰反不足偏勝之害恐有升而不降之虞故又宜氣血之兼補氣能推送而血又足以濟之則汪洋易於轉頭何至有膠滯之憂哉方用送子

丹治之黃芪一兩當歸一兩川芎三錢熟地五錢麥冬  
一兩水煎服二劑子生且無橫生倒養之病此方補氣  
補血之藥也二者相較補血重於補氣補氣止有黃芪  
其餘無非補血之品無論氣血兩平陰陽交泰易於生  
產而血旺於氣則胞胎之內無非血也譬如舟遇水淺  
之區雖用盡人功終難推動忽得春水泛濫則舟能自  
行又遇順風之送有不揚帆而迅走者乎血猶水也氣  
猶風也無水則風雖順何益哉故補氣必須補血耳

用麥冬升麻

湯亦效

麥冬四兩升麻二錢水煎服  
而兒身卽轉易於速下也

婦人有兒已到門竟不能產此危急存亡之時人以爲胞  
胎先破水不能推送之故誰知交骨不開乎蓋產門之  
上原有骨二塊兩相關合未產之前其骨自合將產之  
際其骨自開故交骨爲兒門之關亦爲婦人陰門之鍵  
然其能開能合者氣血主之也無血而兒門自閉無氣  
而兒門不開欲兒門之開闔必須交骨順滑自非大補  
氣血不可然而閉之甚易開之甚難其不開者因產前  
之貪色也過於泄精則氣血大虧交骨粘滯而不易開

故開交骨必須於補氣補血之中用開交骨之藥兩相  
合治不必推生子自迅下方用降子散當歸一兩人參  
五錢川芎五錢紅花一錢牛膝三錢柞木枝一兩水煎  
服一劑兒門一聲响亮骨如解散子乃直降矣此方用  
人參補氣用歸芎補血用紅花活血用牛膝下降用柞  
木開關君臣佐使同心協力所以取效甚神用開於補  
之內也雖單服柞木亦能骨開但無補氣補血之藥則  
開不易合兒門不關不無風入之憂不若用此方而能  
開能閉之爲妙也至於兒未到門萬不可先用柞木以

開其門然用降子散亦正無礙以其補氣補血耳若單用柞木必須俟兒頭到門而後用之也

用突門散

亦效

黃芪二兩敗龜板一箇搗碎牛膝川芎各五錢附子三分水煎服一劑而兒門開兒卽生矣加當歸亦可  
加人參  
更神

婦人生產有脚先下者有手先出者人以爲橫生倒產至危之病誰知氣血甚衰之病乎凡兒在胎中兒身正坐惟男向內坐女向外坐及至生時則頭必旋轉而後生此天地造化之奇實非人力所能勉強雖然先天與後



天未常不並行而不悖天機之動必得人力以濟之人力者非產母用力之謂也謂產母之氣血耳氣血足而胎必順氣血虧而胎多逆蓋氣血既虧則母身自弱子在胎中何能獨強勢必子身怯弱雖轉頭而往往無力故破胞而出此手足之所以先見當是時急以針刺兒手足則兒必驚縮而入急用轉天湯救之人參一兩當歸二兩川芎五錢升麻四分牛膝三錢附子一分水煎服一劑而兒轉身矣急服二劑自然順生此方用人參歸芎以補氣血之虧人盡知其義乃用升麻又用牛膝

附子恐人未識其妙蓋兒已身斜非用提挈則頭不易轉然既轉其頭非用下行則身不速降二者並用非加附子則不能無經不達使氣血之迅達推生也

用轉氣催生

湯亦神

人參二兩川芎五錢當歸黃芪龜膏各一兩升麻旋覆花各一錢水煎服一劑兒即轉身而生矣

婦人有生產三四日子已到門交骨不開子死而母未亡者服開交骨之藥不驗必有死亡之危今幸不死者正因其子之死則胎胞已墮子母離開子死而母氣已收未至同子氣之俱絕也治法但救其母不必顧其子矣

然死子在門塞住其口亦危道也仍宜用補血補氣使  
氣血兩旺死子可出矣倘徒用祛除降墮之劑以下其  
子則子未必下母先脫矣方用救母丹當歸二兩川芎  
一兩人參一兩荆芥三錢益母草一兩赤石脂末一錢  
水煎服一劑子下此方用芎歸以補血用人參以補氣  
氣血既旺上能升而下能降氣能推而血能送安得有  
阻滯之憂乎况益母草善下死胎赤石脂復易化瘀血  
自然一湧而齊出耳

用牛膝益母

湯亦效

牛膝三兩益母草一兩水煎服一劑而死子立下矣  
後用人參當歸各一兩川芎五錢肉桂一錢服之保  
無變  
生也

婦人生產六七日胞水已破子不見下人以爲難產之故  
也誰知其子已死於腹中乎兒在門邊未死者兒頭必  
能伸能縮已死者必安然不動也若係未死少拔其髮  
兒必退入矣若只子死腹中者產母之面必無黑氣母  
不死也若產母有黑氣現面兼唇黑舌黑者子母兩死  
旣知兒死於腹中而母不死不能用藥以降之亦危道  
也雖然生產至七日若用霸道之藥其氣血困乏子下

而母且立亡必須仍補其母補母而子可自出矣方用  
療兒散人參一兩當歸二兩川芎一兩牛膝五錢鬼臼  
三錢乳香末二錢水煎服一劑而死兒下矣凡兒生必  
轉其頭原因氣血之虛致兒頭之難轉世人往往用催  
生之藥耗兒氣血則兒不能通達反致閉悶而死此等  
之死實醫殺之也所以難產之病斷不可輕用催生之  
藥一味補氣補血全活嬰兒之命正無窮也此方救兒  
死之母仍用大補氣血所以救其本也誰知救本正所  
以催生哉

用參芪救母

湯亦神效

人參黃芪各一兩當歸二兩升麻五分龜板一箇母丁香三枚水煎服一劑而死子下生矣

婦人產數日而胎不下服催生藥皆不效前條曾言交骨難開不知又有氣結而不行者夫交骨不開固是難產然兒頭到門不能下者乃交骨之不開也自宜用開骨之劑若兒未到門而不產者非交骨不開之故也若開其交骨則兒門大開兒頭不轉必且變出非常萬萬不可輕開兒門也大約生產之時切忌坐草太早兒未轉頭原難驟生乃早於坐草產婦見兒不下未免心懷懼

恐恐則神怯神怯則氣下而不升氣既不升則上焦閉塞而氣乃逆矣上氣既逆上焦脹滿氣益難行氣阻於上下之間不利氣而催生則氣愈逆而胎愈閉矣治法但利其氣不必催生胎自下也方用舒氣飲人參一兩紫蘇三錢川芎五錢當歸一兩陳皮一錢白芍五錢牛膝三錢柴胡八分水煎服蔥白七寸同煎一劑逆轉兒卽下矣此方利氣而實補氣也氣逆由於氣虛氣虛則易於恐懼補其氣恐懼自定恐懼定而氣逆者不知其何以順也况方中紫蘇柴胡白芍牛膝之類無非平肝

疏肺之品佐人參芎歸實有補利之益也何必開交骨之多事哉

亦可用歸朮降

胞湯治之

當歸二兩白朮二兩柴胡一錢牛膝三錢丹皮三錢  
紅花五錢荆芥三錢益母草五錢水煎服一劑卽產  
又不傷胎



## 血暈門

婦人甫產後忽眼目昏暈惡心欲吐額上鼻尖有微汗鼻  
出冷氣神魂外越人以爲惡血衝心之患也誰知氣虛  
欲脫而血暈乎蓋新產之後血已盡傾血舍空虛止存  
微氣倘其人陽氣素虛則氣怯原不能生血及胎破而  
心血隨胎而墮則心無血養所望者氣以固之也今氣  
又虛脫心君無護所剩殘血非正血不可歸經內庭變  
亂反成血暈之症矣治法必須大補氣血不宜單治血  
暈也補血以生新血正活血以逐舊血也然血乃有形

之物難以速生氣乃無形之物易於迅長補氣以生血  
不更易於補血以生血乎方用解暈湯荊芥三錢人參  
一兩當歸一兩炮薑一錢黃芪一兩水煎服一劑暈止  
二劑心定三劑氣旺四劑血生不再暈也此方實解血  
暈之聖方凡產後能服此方斷無退母之症或人參力  
不能用減去大半或少用一二錢餘如分兩多服數劑  
無不奏功也

用參歸荊芥

湯亦效甚

人參一兩荊芥三錢

當歸一兩水煎服

婦人子方下地卽昏暈不語此氣血雙脫也本在不救我  
受岐天師祕傳以救萬世產亡之婦當急用縫衣鍼刺  
其眉心之穴得血出卽出語矣然後以獨參湯人參一  
兩急煎灌之無不生者倘貧家之婦無力買參用當歸  
補血湯黃芪二兩當歸一兩煎湯一碗灌之亦生萬不  
可於二方之中輕加附子蓋附子無經不達反引氣血  
之藥走而不守不能專注於胞胎不若人參歸芪而救  
其氣血之絕聚而不散也蓋產婦昏暈全是血舍空虛  
無血養心以致血暈舌爲心之苗心旣無主舌又安能

出聲眉心者上通於腦而下通舌系則連於心刺眉心  
則腦與舌俱通心中清氣上升則瘀血自然下降然後  
以參芪當歸補之則氣血接續何能死亡乎雖單用參  
芪當歸亦能生者然終是刺眉心則萬無一失瘀血冲  
心所以昏暈不語解其瘀血之冲真所謂扼要爭奇也  
世人但知灸肩之法誰知刺勝於灸乎蓋灸緩而刺急  
緩則難以救絕急則易於回生耳

亦可用參附益

母湯治之

人參一兩附子一錢益母草二錢水煎遇此等症急  
用一人拖住產母頭頂心解開以艾火急灸之必然

出聲然後以參附益  
母湯救之多有生者

婦人有產後三日發熱惡露不行敗血攻心狂言呼叫甚  
欲奔走拏捉不定人以爲邪熱之在胃也誰知血虛而  
心無以養乎產後之血盡隨胎胞外越則血室空虛五  
臟皆無血養當是之時止心中之血尙存些微以護心  
也而各臟腑皆欲取給於心心包爲心君之相攔絕各  
臟腑之氣不許入心故心安神定是護心者全藉心包  
也然心包亦虛倘不能障心各臟腑之氣遂直入心中  
以分取心血而心包情極旣不能顧心又不能禦衆於

是大聲疾呼本欲召臟腑以救心而迹反近於狂悖有  
無可如何之象故病似熱而非實熱也治法大補其心  
中之血使各臟腑分取之以自養不必再求於心君則  
心安而心包亦安方用安心湯乾荷葉一片生地黃五  
錢丹皮五錢當歸二兩川芎一兩生蒲黃二錢水煎調  
服一劑卽定而惡露亦下矣此方用歸芎以補血何又  
用生地丹皮之涼血似非產後所宜不知惡血奔心未  
免因虛熱而相犯吾於補中涼之則涼不爲害況益之  
乾荷葉則七竅相通能引邪外出不內害於心轉生蒲

黃以分解惡露也但此方止可暫用一劑以定狂不可多用數劑以取勝不可不慎也

用參歸荆棗益

母湯亦效

人參當歸炒棗仁各一兩荆  
芥益母草各三錢水煎服





# 胞衣不下門

婦人兒已生地而胞衣尚留於腹三日不下心煩意躁時欲暈去人以爲胞胎之蒂未斷也誰知血少乾枯黏連於腹乎世見胞衣不下心懷疑懼恐其上衝於心有死亾之兆然胎衣何能冲於心也但胞衣未下則瘀血未免難行有血暈之虞耳治法仍大補氣血使生血以送胎衣則胎衣自然潤滑生氣以助生血則血生迅速尤易推墮也方用送胎湯當歸二兩川芎五錢乳香末一錢益母草一兩沒藥末一錢麝香半分研荊芥三錢水

煎調服立下此方以當歸川芎補其氣血以荊芥引氣  
血歸經用益母草乳香等藥逐瘀下胎新血既長舊血  
難存氣旺上升瘀濁自然迅降無留滯之苦也蓋胞衣  
留腹有回顧其母胎之心往往有六七日不下胞衣竟  
不腐爛正以其有生氣也可見胎衣在腹不能殺人補  
之自降也或謂胞衣既有生氣補氣補血則胞衣宜益  
堅牢何補之反降不知子未下補則益於子子已下補  
則益於母益子而胞衣之氣連益母而胞衣之氣脫實  
有不同故此補氣補血乃補各經之氣血以推送之非

補胞膽之氣血是以補氣補血而胎衣反降也

用加味佛手

散殊效

當歸二兩川芎一兩益母草五錢乳香末  
一錢敗龜板一具水煎服一劑卽下也

婦人子生五六日胞衣留於腹中百計治之竟不肯下然  
又絕無煩躁昏暈之狀人以爲瘀血之黏連也誰知氣  
虛不能推送乎夫瘀血在腹斷無不作祟之理有則必  
然發暈今安然無恙是血已淨矣血淨宜清氣升而濁  
氣降今胞胎不下是清氣下陷難升遂至濁氣上浮難  
降然濁氣上升必有煩躁之病今反安然者是清濁之

氣兩不能升也然則補其氣不無濁氣之上升乎不知  
清升而濁降者一定之理也苟能於補氣之中仍分其  
清濁之氣則升清正所以降濁矣方用補中益氣湯人  
參三錢黃芪一兩當歸五錢升麻三分柴胡三分陳皮  
二分甘草一分白朮五錢加蘿蔔子五分水煎服一劑  
胎衣自下夫補中益氣湯補氣之藥卽提氣之藥也並  
非推送之劑何能下胎衣如此之速不知濁氣之下陷  
者由於清氣之不升也提其氣則清氣升而濁氣自降  
腹中所存之物無不盡降正不必又去推送之也况方

中又加蘿蔔子數分能分理清濁不致兩相杆格此奏  
功之所以神耳

用加味補血

湯亦神效

黃芪二兩當歸一兩升麻五分  
益母草三錢木煎服一劑卽下



產後諸病門

婦人產後小腹疼痛甚則結成一塊手按之益痛此名兒枕痛也夫兒枕者前人謂兒枕頭之物也兒枕之不痛豈兒生不枕而反痛乎是非兒枕可知既非兒枕何故作痛乃瘀血成團未散之故也此等之痛多是健旺之婦血之有餘非血之不足似可用破血之藥然血活則瘀血自除血結則瘀血作崇不補血而敗血雖瘀血可消畢竟耗損血氣不若於補血中行其逐穢之法則瘀血既去氣血又復不傷方用散結安枕湯當歸一兩川

芎五錢山查十粒丹皮二錢荆芥二錢益母草三錢桃  
仁七箇乳香一錢水煎調服一劑痛卽止不必再劑此  
方逐瘀於補血之中消塊於生血之內不專攻痛而其  
痛自止人一見兒枕之痛動以延胡蘇木蒲黃五靈脂  
之類以化塊何足論哉

用歸荆安枕

湯亦神

當歸五錢丹皮一錢荆芥三錢  
山查十粒水煎服一劑卽止痛

產後小腹痛按之卽止人亦以爲兒枕之痛也誰知血虛  
之故乎產後亡血過多則血舍空虛原能腹痛但痛實



不同如燥糠觸體光景此乃虛痛非實痛也凡虛痛宜補而產後之虛痛尤宜補惟是血虛之病必須用補血之劑而補血之味大約潤滑居多恐與大腸不無相礙然而產後則腸中乾燥潤滑正相宜也故補血不特腹中甚安腸中亦甚便耳方用腹寧湯當歸一兩續斷二錢阿膠三錢人參三錢麥冬三錢炙甘草一錢山藥三錢熟地一兩肉桂二分水煎服一劑痛輕二劑痛止多服更美此方補氣補血之藥也然補氣無太甚之憂補血無太滯之害氣血既生不必止痛而痛自止矣

用朮歸桂草

湯亦神

白朮當歸各五錢肉桂五分  
炙甘草一錢木煎服二劑愈

產後氣喘最是危症苟不急治立刻死亡人以爲氣血之  
兩虛也誰知氣血之兩脫乎夫氣血旣脫人將立死何  
故又能作喘此血已脫而氣猶未脫也血脫欲留而氣  
又不能留血之脫故氣反上喘但其症雖危而可救處  
正在於作喘肺主氣也喘則肺氣若盛而不知是肺氣  
之衰當是時血雖驟生止存些微之氣望肺之相救甚  
急肺因血失氣實無力難以提挈則氣安保不遽脫乎

是救氣必須提氣而提氣必須補氣方用救脫活母丹  
人參二兩肉桂一錢當歸一兩麥冬一兩山茱萸五錢  
熟地一兩枸杞子五錢阿膠三錢荊芥炒黑三錢水煎  
服一劑喘輕二劑喘又輕三劑喘平四劑全愈此方用  
人參以接續元陽然徒補其氣不補其血則血燥而陽  
旺雖回陽於一時而不能制陽於永久亦旋得旋失之  
道也卽補其血矣不急補其腎肝之精則水實不固陽  
將安續乎所以又用熟地茱萸枸杞以補其肝腎之精  
後益其肺氣則肺氣健旺升提有力也又慮新產之後

用補陰之藥膩滯不行加入肉桂以補其命門之火非  
惟火氣有根易助人參以生氣且能運化地黃之類以  
化精微也然過於助陽萬一血隨陽動瘀血上行亦非  
萬全之計更加荊芥引血歸經則肺氣更安喘尤速定  
也

用蛤蚧救喘

丹亦佳

人參二兩熟地二兩麥冬三錢肉桂一錢蘇子一錢  
蛤蚧二錢半夏三分水煎服三劑喘定十劑全愈

婦產後惡寒惡心身顫發熱作渴人以爲產後傷寒也誰  
知氣血兩虛正不敵邪之故乎凡人正氣不虛則邪斷

難入若正氣已虛原不必戶外之風襲體卽一舉一動風卽乘虛而入矣雖然產婦風入易而風出亦易凡有外邪俱不必祛風況產婦惡寒者寒由內生非由外進也發熱者熱因內虛非由外實也治其內寒而外寒自散治其內熱而外熱自解矣方用十全大補湯人參三錢黃芪一兩白朮五錢茯苓三錢甘草一錢熟地五錢白芍二錢川芎一錢當歸三錢肉桂一錢水煎服二劑寒熱解身涼矣此方但補其氣血之虛絕不夫散風邪之實正以正氣旣足邪氣自除况原無邪氣乎所以治

之奏功也

用正氣湯

亦效

人參當歸各一兩肉桂炮姜各一錢  
白朮五錢甘草五分水煎服二劑愈

一產後惡心欲嘔時而作吐人以爲胃氣之寒也誰知腎氣之冷乎夫胃爲腎之關胃氣寒則胃不能行於腎中腎氣寒則胃亦不能行於腎內是胃與腎原不可分爲兩治也惟是產後失血腎水自涸宜腎火之炎上不宜胃有寒冷之虞何腎寒而胃亦寒乎蓋新產之餘其水遽然涸去其火尙不能生而寒象自現治法當補其腎

中之火矣然腎火無水以相濟則火過於熱未必不致  
陰虛火動之虞必須於火中補火腎中溫胃而後腎無  
太熱之病胃有既濟之歡也方用溫胃止嘔湯人參三  
錢橘紅五分白豆蔻一粒巴戟天一兩白朮一兩茯苓  
二錢炮薑一錢熟地五錢山茱萸五錢水煎服一劑吐  
止二劑不再吐也四劑全愈此方治胃之藥多於治腎  
然治腎仍是治胃所以胃氣升騰寒氣盡散不必用大  
熱之味以溫胃而祛寒也

用全母湯

亦神

白朮人參熟地各一兩肉桂二錢炮薑五分  
丁香五分山藥五錢水煎服一劑卽止嘔吐

產後腸下者亦危症也人以爲兒門不關之故誰知氣虛  
下陷而不收乎夫氣虛下陷宜用升提之藥以提氣矣  
然而新產之婦恐有瘀血在腹若提氣併瘀血亦隨之  
而上升則衝心之症又恐變出非常是不可竟提其氣  
補其氣則氣旺而腸自升惟是補氣之藥少則氣衰力  
薄難以上升必須多用則陽旺力大而豈能終降耶方  
用升腸飲人參一兩黃芪一兩白朮五錢當歸一兩川  
芎三錢升麻一分水煎服一劑而腸升矣此方純乎補



氣絕不去升腸卽加升麻之一分但引氣而不引血蓋升麻少用則氣升多用則血升也

產後半月血崩昏暈目見鬼神人以爲惡血冲心也誰知不慎於房幃乎夫產後半月其氣血雖不比初產之一二日然氣血新生未能全復卽血路已淨而胞胎之傷損如故斷不可輕易交合以重傷其門戶今血崩而至昏暈且目見鬼神是心腎兩傷不止損壞胞胎門戶已也明是旣犯色戒又加酣戰以致大泄其精精泄而神亦脫矣此等之症多不可救然於不可救之中思一急

救之法舍大補其氣無別法也方用救敗求生湯人參  
三兩熟地一兩當歸二兩川芎五錢白朮二兩附子一  
錢山茱萸五錢山藥五錢棗仁五錢水煎服一劑神定  
再劑必暈止而血亦止否則不可救矣倘一服見效連  
服三劑減半再服十劑可慶更生此方補氣回元陽於  
無何有之鄉陽回而氣回矣氣回可以攝血以歸神可  
以生精以續命不必治暈而暈除不必止崩而崩斷也  
用救死丹治  
之亦可

黃芪二兩巴戟天一兩附子一錢白朮一兩兔絲子  
一兩北五味一錢水煎服一劑神定便有生機可再

服也否  
則不救

婦人生產之時因收生之婆手入產門損傷尿胞因致尿  
滴不止欲少忍須臾而不能人以爲胞破不能再補也  
夫破傷在皮膚者尚可完補豈破傷在腹獨不可治療  
乎試思瘡瘍之毒大有缺陷尙可服藥以長肉况收生  
不謹少有傷損並無惡毒何難補其缺陷耶方用完胞  
飲人參一兩白朮一兩當歸一兩川芎五錢桃仁十粒  
黃芪五錢茯苓三錢紅花一錢白芨末一錢益母草三  
錢以豬羊胞先煎湯後熬藥饑服二十日全愈蓋生產

致收生之婆以手探胞其難產必矣難產者因氣血之  
虛也因虛而損復因損而虛不補其氣血而臍破何以  
重完乎今大補氣血則精神驟長氣血再造少有損傷  
何難完補故旬日之內即便成功耳

用補胞散

亦神效

人參二兩黃芪一兩麥冬一兩白朮四兩穿山甲三  
片陳土炒髮研細末象皮三錢人身懷之研細末龍  
骨醋煅研末水煎藥汁一碗空腹將三味調服  
即熱睡之愈久愈效不須三服全愈真神方也

婦有產子之後四肢浮腫寒熱往來氣喘咳嗽胃膈不利  
口吐酸水兩脇疼痛人以爲敗血流入經絡滲入四肢

以致氣逆也。誰知腎肝兩虛，陰不能入於陽乎？夫婦當產後，氣血大虧，自然腎水不足，腎火沸騰，水不足則不能養肝，而肝木大燥，木中無津，火發於木，而腎火有黨。子母兩焚，將火焰直沖而上，金受火刑，力難制肝，而咳嗽喘滿之病生。肝火既旺，必尅脾土，土衰不能制水，而浮腫之病出。然而肝火之旺，乃假旺，非真旺也。假旺者，氣若盛而實衰，故時熱時寒，往來無定，非真熱真寒，是以氣逆於胃膈而不舒，兩脅者，尤肝之部位也。酸乃肝木之味，吐酸脅痛，皆肝虛而腎不能榮之故也。治法補

血養肝更宜補其精以生血精足而血亦足血足而氣自順矣方用人參三錢熟地一兩山茱萸三錢白芍五錢當歸五錢破故紙茯苓芡實各三錢山藥五錢柴胡五分白朮三錢水煎服方名轉氣湯方中多是補精補血之品何名爲轉氣耶不知氣逆由於氣虛氣虛者腎肝之氣虛也今補其腎肝之精血卽所以補其腎肝之氣也氣虛則逆氣旺有不順者乎是補氣卽轉氣也氣轉而各症盡愈陰入於陽而陽無杆格之虞矣

用歸氣救產

湯亦效

人參三錢熟地五錢白芍二錢茯苓一錢山藥  
五錢白朮五錢柴胡三分砂仁一粒水煎服

婦人產後水道中出肉線一條長三四尺動之則痛欲絕  
此帶脉之虛脫也夫帶脉束於任督之脉任前而督後  
兩脉有力則帶脉堅牢兩脉無力則帶脉崩墮產後亡  
血過多無血以養任督而帶脉崩墮力難升舉故隨溺  
而隨下也帶脉下垂每作痛於腰臍況下墮而出於產  
門其失於關鍵也更甚安得不疼痛欲絕哉治法大補  
其任督之氣則帶脉自升矣方用兩收丹白朮二兩人  
參一兩川芎三錢巴戟天三錢山藥一兩芡實一兩白

果十枚篇豆五錢杜仲五錢熟地二兩山茱萸四錢水煎服一劑收半再劑全收此方補任督而仍補腰臍者以任督之脉聯於腰臍補任督而不補腰臍則任督無力而帶脉何以升舉哉惟兼補之任督得腰臍之助則兩脉氣旺何難收帶於頃刻乎

用收帶湯

亦效

白朮杜仲人參各一兩荆芥二錢木煎服一劑即收大半二劑全收亦不痛也

婦人產後陰戶內一物垂下其形如帕或有角或二歧人以爲產頽也誰知肝痿之病乎夫產後何以成肝痿也



蓋因產前勞役傷氣又觸動惱怒產後肝不藏血血亡過多故肝之脂膜隨血崩墮其實非子宮也若子宮下墮狀如茄子止到產門不越出產門之外肝之脂膜往往出產門者至六七寸許且有黏席乾落者一片如掌大使子宮墮落人且立死矣安得重生乎治法大補其氣血而少用升提之法則脾氣旺而易升肝血旺而易養脂膜不收而自收矣方用收脂湯黃芪一兩人參五錢白朮五錢升麻一錢當歸三錢白芍五錢水煎服一劑卽收或疑產婦禁用白芍何以頻用奏功嗟乎白芍

原不可頻用也然而病在肝者不可不用况用之於大補氣血之中在芍藥亦忘其酸收矣何能作崇乎且脂膜下墮正藉酸收之味助升麻以提氣血所以無過而反能奏功耳

用葳蕤收陰  
湯亦效

葳蕤二兩人參一兩白芍三錢當歸一兩柴胡五分水煎服四劑愈十劑全愈

## 下乳門

婦人產後數日絕無點滴之乳人以爲乳管之閉也誰知  
氣血之涸乎夫無血不能生乳而無氣亦不能生乳乳  
者氣血所化也然二者之中血之化乳又不若氣之化  
乳爲速新產之後血已大虧生血不遑何能生乳全藉  
氣以行血而成乳也今數日乳不下血誠少而氣尤微  
世人不知補氣之妙一味通乳無氣則血從何生無血  
則乳從何化不幾向乞人而求食問貧兒而索金耶治  
法補其氣以生血不可利其竅而通乳也方用通乳丹

人參一兩當歸二兩麥冬五錢黃芪一兩猪蹄二箇木  
通三分桔梗三分水煎服二劑而乳如泉流矣此方但  
補氣血以生乳正以乳生於氣血也

用化乳丹

亦佳

當歸熟地黃芪各一兩麥冬三錢山茱萸四錢川山  
甲一片兔絲子五錢枸杞子三錢水煎服連用四劑  
即多乳矣

有壯婦生產後數日或聞丈夫之嫌或聽公姑之啐遂至  
兩乳脹滿作痛乳汁不通人以爲陽明之火也誰知肝  
氣之鬱結哉夫陽明多氣多血之腑乳汁之化原屬陽

明然而陽明屬土必得肝木之氣相通則稼穡作甘始成乳汁未可全責之陽明也壯婦產後雖亡血過多而氣實未衰乳汁之化全在氣而不盡在血也今產數日而兩乳脹滿作痛是欲化乳而不可得明是有鬱而肝氣不揚陽明之土氣亦因之同鬱木土不相合而相鬱安得而化乳哉治法大抒其肝木之氣則陽明之氣血自通不必通乳而乳自通也方用通肝生乳湯白芍五錢當歸五錢麥冬五錢通草一錢柴胡二錢白朮五錢甘草三分熟地一兩遠志一錢水煎服一劑卽通此方

藥味太重治產婦似乎不宜不知健婦抱鬱不妨權宜用之若非少壯之女雖因鬱少乳不可全用減半治之亦不全失又在臨症時裁酌之也

用生汁湯

亦佳

當歸二兩川芎四錢通草一錢柴胡五分麥冬四錢白朮五錢甘草三分熟地一兩水煎服四劑必大通